

四庫全書

集部

欽定四庫全書

集部

范太史集卷一至四

詳校官庶吉士臣何道沖

檢討臣何思鈞覆勘

總校官進士臣楊懋珩

校對官中書臣嵇承志

謄錄監生臣蔣錦城

欽定四庫全書

集部三

范太史集目錄

別集類二宋

卷一

詩

卷二

詩

卷三

詩

卷四

表狀劄子

卷五

表狀劄子

卷六

表狀劄子

卷七

表

卷八

表狀

卷九

表

卷十

表狀

賤功德疏右語附

卷十一

表

卷十二

表  
筋記附

卷十三

奏議

卷十四

奏議

卷十五

奏議

卷十六

奏議

卷十七

奏議

卷十八

奏議

卷十九

奏議

卷二十

奏議

卷二十一

奏議

卷二十二

奏議

卷二十三

奏議



卷二十四

奏議

卷二十五

奏議

卷二十六

奏議

卷二十七

進故事

卷二十八

翰林詞草

卷二十九

翰林詞草

卷三十

翰林詞草

卷三十一

翰林詞草

卷三十二

翰林詞草

卷三十三

翰林詞草

樂語附

卷三十四

啓狀

卷三十五

賦

論

策問

卷三十六

記

序

銘

書

傳

卷三十七

青詞

祭告文

哀詞

誄文

卷三十八

墓誌銘

卷三十九

墓誌銘

卷四十

墓誌銘

卷四十一

墓誌

神道碑銘

卷四十二

墓誌銘

卷四十三

墓誌銘

卷四十四

墓誌銘

卷四十五

皇族墓誌銘

卷四十六

皇族墓誌銘

卷四十七

皇族墓誌銘

卷四十八

皇族墓誌銘

卷四十九

皇族墓誌銘

卷五十

皇族墓誌銘



卷五十一

皇族墓誌銘

卷五十二

皇族墓誌銘

卷五十三

皇族追封記

石記

卷五十四

皇族石記

卷五十五

手記

臣等謹案范太史集五十五卷宋范祖禹撰  
祖禹字淳甫華陽人嘉祐八年登進士甲科  
從司馬光修通鑑書成薦為秘書省正字歷  
官龍圖閣學士知陝州為言者所誣謫徙賓  
化而卒事蹟具宋史本傳所著帝學及唐鑑

諸書已別著錄其文集世有兩本一本僅十  
八卷乃明程敏政從秘閣借閱因為摘鈔以  
行世實非全書此本五十五卷與宋史藝文  
志馬端臨經籍考所載卷目相符蓋猶宋時  
舊帙也祖禹平生論諫不下數十萬言其在  
邇英守經據正號講官第一史臣稱其開陳  
治道區別邪正辨釋事宜平易明白洞見底  
蘊故本傳載所上疏至十五六篇而集中章

奏尤多類皆湛深經術練達事務深有裨於  
獻納其中偶涉偏執者如合祭天地一事祖  
禹謂分祭之禮自漢以來不能舉行又謂一  
年再郊此必不能且夏至之日尤未易行同  
時蘇軾等据周禮以分祭為是而祖禹與顧  
臨堅持之後卒從祖禹之議蓋其君習於宴  
安而議者遂為遷就之論誠不免於賢者之  
過然其大端伉直持論切當要自無愧於醇

儒當時以賈誼陸贄比之說者不以為溢美  
云乾隆四十四年二月恭校上

總纂官臣紀昀陸錫熊臣孫士毅

總校官臣陸費墀



欽定四庫全書

范太史集卷一

宋 范祖禹 撰

詩

樂通神明

御試

世治興和樂陽來符正聲純能格天地幽可逮神明協  
氣流無外靈心識太平九歌人鬼享八變地祇迎翕縱  
多祥集欣歡萬祉生須知勲德大聖作掩英莖

春鮪初登

錫慶院試

風煦陽和候永消水澤春乘舟施密罟登鮑薦明神大  
壑翻紅鬣長波失錦鱗味參籩實美羞與澗毛新事異  
觀棠日時非濫泗辰猗歟潛有頌率職自獻人

游先主祠堂置酒

驅車出郊坰涉谿上青岑峰頭野寺不足到先主祠堂  
猶可尋祠堂之前流水長翠屏重疊搖清光老松窈窕  
入雲漢五月鬱鬱炎天涼廟中女巫日歌舞神去神來  
何處所龍吟虎嘯生風雲未似當時臣遇主三分割據



霸業開山河氣象皆西來功名烜赫陵宇宙顧盼可使  
彊敵摧西南歷數俄遷改岷峨霸氣今何在萬里浮雲  
卷壯圖空餘江水東流海山風吹月海上來松間雲氣  
噓酒盃高歌且醉一杯酒昔日英雄安在哉此時分散  
已陳迹何足慘愴令心哀

四皓

南山石壁陵蒼蒼中有四老眉如霜中原龍虎困格鬪  
九霄鸞鳳高飄翔赤精斬蛇入咸陽南極老人轉遁藏

一朝相顧下雲巘共為羽翼安儲皇白雲黃鵠高飛揚  
雖有繒繖安能傷君王慷慨但飲酒戚姬起舞無輝光  
古人不見雖已遠吾將杖策登崇岡

席上探題二首

紅蕉花誰植風流太守家爍爍犀燈燃晚雨亭亭蜜炬  
照晴霞

秋夜雨點滴梧桐亂人語幾行寒雁起沙汀萬里漁舟  
泊煙渚

資水

資水通巫峽誰家萬里船  
隨雲排楚氣隱几上吳天  
神女迷朝雨湘娥泣暮煙  
何時一飛檝長嘯下牢邊

資中八首

劍閣橫空鑲蜀門  
資中巖岫若雲屯  
天傾白日千山底  
峽束長江萬里奔

資山巖谷多神仙  
鸞車鳳馬隨飛煙  
神女蕭蕭來暮雨  
浮丘往往下雲輶

醺壇高倚碧天開中有清都白玉臺霧擁霓旌乘月去  
風吹仙樂下天來

五月江流萬賈船迅如飛電摩羣山荆雲峽雨須臾過  
白帝江陵朝暮間

六月炎蒸烈火高黑雲驅雨駕波濤千崖雪浪飛泉吼  
萬壑陰雲古木號

風定江澄境界閒水清波影倒雲山漁舟蕩漾清光裏  
白鷺驚飛杳靄間

夷界荒山幾萬重西窮月窟與天通  
何時漢使還持節從此乘槎上碧空

武侯祠廟徧空山萬古名垂宇宙間  
昔日南人皆稽首至今歌舞聚夷蠻

資州路月山亭

軒亭枕蒼峯縹緲視空濶長江翻天去  
迴斡地軸折洪濤破山門崖谷盡爭裂  
孤雲行無蹤飛鳥去自沒游子怨路長  
煩襟此披豁昔觀黃河流浩蕩窺禹穴  
乾坤何

壯觀永歎舊遊絕茲亭雖非匹山水頗秀發茫茫八紘  
內所歷但毫末安得乘飛颺人寰恣超越

資州路東津寺

寺有古佛殿唐  
乾寧元年所建

山行無晨暮日暝崖谷昏哀猿落客淚永路驚旅魂憑  
陵高山巔俯視大江奔迴環島嶼合縈轉洲渚屯行雲  
赴楚天飛鳥下蜀門地遐怪物聚寺古深殿存憶昔李  
氏末煙塵暗中原姦雄競草竊割據窮海根干戈百年  
後見此敗屋垣我來屬清秋登覽無俗喧山深虎豹歸

水靜蛟鼉騫臨風獨笑吒浩蕩欲飛翻

月夜船行入資州

憶昨卧碧山蒼蒼叢桂間白雲為屏石為枕綠蘿長掛  
明月閒忽乘輕舟泛江水山月隨人還在此白鷺驚飛  
宿靄間青山倒卧滄波底此時孤棹發中流川后停波  
聽棹謳不學子猷中夜返欲乘明月向資州

七月五日熱退喜涼資中有懷二十四韻

仲夏金火爭陰陽勢相奪乾坤鼓洪鑪夸父死奔渴普

天無纖雲厚土萬丈裂亭亭太陽午安得日車跌清冷  
想寒門浩蕩思舞雪嘆彼老農耕有苗不得活乞雨禱  
潭龍望雲驅旱魃帝車俄迴指四序苦飄忽木落天地  
秋清霜洗空濶涼風破閭闔勢欲捲溟渤衆鳥盡不飛  
崢嶸見孤鶻登臨滌魂神颯爽動毛骨因懷京洛間車  
馬填城闕紅塵暗天宇愚智共汨沒出門無所適肝肺  
為枯竭平生喜林泉瀟灑愛風月滄浪有漁父逸步脫  
羈紲超然思遠遊萬古訪遺轍安能公侯間俯俸事干



謁及來山水縣素志得少豁白石拂雲眠芳蓀乘露擷  
尋山喜幽勝照水翫澄澈雖無巢許操夙慕夷齊潔庶  
以保吾真無為事其末

文潞公生日

天監仁皇德惟時嶽降神英姿備文武賢業富經綸夢  
賁求巖野于岐載渭濱三朝瞻上宰四海入洪鈞謨烈  
重光啓樞衡萬化新珪璋扶日月劒履上星辰述職分  
東陝宣威震北垠長城萬里遠奠枕四夷賓自昔登儲

后惟公秉國均川河賴舟楫霜雪見松筠閭閻朝黃道  
雲龍對紫宸忠勲藏廟祐異禮冠臣鄰風雨王城會煙  
花洛苑春麾幢近泉石袞繡出埃塵照社祥光盛充問  
慶旦臻御鑪熏黼黻天廐輟騏驎帝念深元老邦基屬  
柄臣公雖慕前哲天欲覺斯民左右蕭何手安危晉國  
身濟時歸壽域遐筭等靈椿

送趙清憲入蜀

上聖隆西眷中朝報鉅賢三刀重夢寐四國賴蕃宣自

昔方隅遠惟公惠澤偏  
絃歌初撫字使節再聯翩  
召父深仁浹文翁美化全  
南圖迴海浪北極上星躔  
霖雨蘇羣物卿雲被八埏  
從容方論道引避不居權  
忠馭何頻叱行帷又一褰  
漏天開霧雨燒棧掃雲煙  
玉壘山橫雪羅江水映絲  
閭閻瞻冕服父老識旌旃  
清靜嘗能理煩苛冀盡蠲  
銷兵無吠警含哺但安眠  
富庶寧加此功名固有焉  
豈惟私蜀土佇更秉陶甄

送聖徒入京兼呈紀常子進

二年隔京洛思見亦已久驪駒將戒行姑共一杯酒君  
來買園林山川既富有顧我猶旅人安排卧林藪不意  
嵩嶺雲輸君先入手謀生已知拙高遁慙居後貴富等  
浮雲名聲似箕斗終當結茅屋鄰舍聞雞狗杖屨作往  
還過從惟野叟愛君修竹間一水似崖口掃除石上月  
寒檜搖青幕早賦歸去來無為事奔走前期知非遠同  
集待諸友寄我思洛詩東風想回首

大雪入洛陽

昨夜關山雪僕夫晨起驚揮鞭騎紫馬曉入洛陽城川  
原渺茫茫長嘯視八紘有如乘風馭迢遞奔玉京伊水  
象天河雲濤向東傾喧然古都市沽酒吹玉笙予心正  
浩蕩萬里赴歸程遙望嵩峰頂連天凍崢嶸欲攀玉女  
窓舉手摩太清思之不可去悵望空含情

寄名山李著作

劍外雖云遠名山信日聞漏天常洩雨蒙頂半藏雲萬  
里飛鳬舄三年隱豹文茗芽春後好應許故人分

底柱四首

黃河傾落九天來  
底柱三山立欲摧  
崖谷吐吞成霧雨  
蛟龍戰鬪作風雷

巨靈顛顛兩山開  
東放黃河萬里來  
地軸橫斜爭幹轉  
天維欲側恐傾摧

禹開底柱放河奔  
濁浪軒軒日月昏  
唯有三門君不見  
驚波一起動乾坤

底柱初開禹力窮  
黃河從此去朝宗  
長鯨一噴連山起

岌業高於太華峰

望嶽

客行西入函關道，秀氣東來滿關好。  
北顧黃河天際流，回望荆山欲傾倒。  
前瞻太華三峯高中天，屹立爭雄豪。  
羣山朝嶽皆西走，勢似長風驅海濤。  
金天殺氣何蕭爽，羽駕飈輪應可往。  
安得雲梯倚碧空，上拂煙霞看仙掌。

希夷陳先生祠堂

太華朝紫清，蓮花開綠烟。  
嘗聞希夷隱，欲學南華仙。  
道

與寥廓友形隨變化遷餐霞倚八極御氣遊九天靜夜  
披藥笈清晨漱瑤泉閒臨日谷嘯下拂雲窓眠一朝玉  
棺墜委體同蛻蟬霓旌自宛轉羽駕何飄翩空餘故館  
在遺像猶依然嗟吾生已後不得見當年扶搖若可借  
永謝區中緣

望朝元閣

昔年曾上閣邊行步步凌霞出太清鶴駕不歸雲縹緲  
鳳簫空斷目分明秦川錯繡孤煙媚渭水浮銀落日橫



惆悵重遊今未遂參差天半望飛甍

長安

東風吹塵客心起京華去蜀三千里我來踏雪走函關  
下視秦川坦如坻曉登太華三峯寒憑高始覺天地寬  
却惜京華不可見煙花二月過長安長安通衢十二陌  
出入九州橫八極行人來往但西東莫問興亡與今昔  
昔人富貴高臺傾今人歌舞曲池平終南虛繞帝王宅  
壯氣空蟠佳麗城黃河之水東流海漢家已去唐家改

茂陵秋草春更多豪傑今無一人在細觀此事何足愁  
不如飲酒登高樓秦王何苦求九鼎魏武空勞營八州  
當年富貴一時事身後寂寞餘高丘春風開花不易得  
一醉何必封公侯

過朝天嶺二首

夜上朝天曉不極舉頭唯見蒼蒼色迴看初日半輪明  
下視嘉陵千丈黑

地拆天開此險成飄蕭毛髮壯心驚人間行路難如此

嘆息何時險阻平

遊李少師園十題

松島

孤嶼何亭亭蒼松鬱相對池中蛟龍起天際風雨會

炎池

向日鋪青蓋浮波散綠盤明珠洛浦珮白玉水仙丹

笛竹

鳳食實已美龍吟聲更奇惜無蔡邕識那得馬融吹

鶴

王子吹笙去仙禽下雲端夜棲松月靜朝舞檜風寒

水輪

崩騰噴雪浪晝夜無停息迴旋天磨轉運動日卓側

竹徑

整整植翠旗森森列羽衛微風羣玉動赫日蒼雲翳

蓮池

藻荇徧迴塘芙蓉出清水紅燈迭照映翠蓋相磨倚

月桂

天寒桂子墮  
花發向庭中  
月華十二滿  
常照此芳叢

雁翅栢

高枝含煙霧  
密葉張羽翼  
參差隨風勢  
慘澹入雲色

茅菴

結茅深林下  
開戶流水邊  
曉聽松風坐  
夜枕雲濤眠

和張二十五遊白龍谿甘水谷郊居雜咏七首

君家瀟灑住園林  
更入青山逕路深  
唯有白雲為得侶

祇應流水是知音

松姿鶴性自宜閒  
天與幽奇避俗喧  
謝客風流臨海嶠

秦人歌嘯入花源

南窗高卧看雲生  
日暮迴風動紫荊  
鼓吹不須過野塢

青蛙雨後自能鳴

田家何所樂  
野老飯蒿藜  
沙月鷺投宿  
松風猿亂啼  
侵衣青竹冷  
拂面綠蘿低  
幽步無車馬  
唯應杖可攜

石逕人行少  
山雲袖拂看  
水流情共遠  
天濶望隨寬  
笙

磬珍禽響龍蛇怪蔓盤洛川回首處烟靄暮漫漫

夜靜月明谿水喧先秋風物已蕭然藤蘿作帳雲為枕  
冷掛絺衣石上眠

青山跬步去無由唯有登臨可散憂浮世只知軒冕樂  
幾人能得少時休

西街

西街春日永輦道與天通御水橫銀漢仙橋掛綵虹  
荒平樂館花發上陽宮擾擾都門路輪蹄日向東

和子進六言二首

夜靜碧天如水山空明月隨人此興庾公非淺遠遊王  
子何頻

蕭散獨遊何處寂寥四顧無人月露霑衣覺久水風吹  
面宜頻

和子進千春院觀桃花二首

西度天津水見沙輕風飛蓋綠楊斜相逢喜到千春寺  
最後方開第一花富媪英華當間出東君照育想非賒



神仙高格黃裳色安得深根植帝家

鳳剝花光照碧霄龍樓柳色暗朱橋  
夸娥素月人疑近姑射仙山路豈遙  
琮玉溫姿輕拂拂鞠衣嘉色宛飄飄  
都人莫怪芳華晚如隔煙霞在沈寥

三月十八日雨後訪張二十五以詩見寄次其

韻

池上魚相樂林間鳥不驚  
雨餘荷氣濕風動水紋生  
俗客心猶爽高人興自清  
何時作鄰里卜宅剪榛荆

又和再寄二首

青春忽已過白髮不須驚  
招隱尋居士論文訪友生  
到來塵慮息歸去夢魂清  
尚想穿幽徑楸花間紫荆  
花落春臺靜鶯啼曉枕驚  
竹間流水過窗外白雲生  
襟抱懷永爽詩篇叩玉清  
荒唐漆園吏環堵但披荆

張三十病愈久不相見以詩寄問

公幹清漳卧維摩  
淨室居作詩心在否  
問法意何如  
臺榭花飛盡  
池塘雨洗初  
劇談能強起  
便欲駕柴車

和張二十五春日見寄五首

綽約花無語，間關鳥自吟。及時須賞翫，風雨不能禁。

莫恨生華髮，唯須不負春。風光無老少，祇屬有情人。

來詩

云未分  
生華髮

瀟灑幽棲地，山嵐日夕昏。松風吹綠綺，溪月湛清樽。

白日春臺上，歡娛莫訴盃。飛花留客醉，啼鳥近人來。

流水家家入，脩篁處處同。城南履道宅，白傅有遺風。

和子進夏日憶寶上人

徑蘚鋪蒼錦  
林花落絳趺  
山光入戶牖  
雲氣起瓶盂  
宴坐期三月  
迷行有萬途  
寥寥方丈室  
一物更應無

秋夜

月上霜威重  
煙消霽景分  
嶺猿寒嘯侶  
澗鹿夜呼羣  
天靜纖毫見  
山空落葉聞  
此時真吏隱  
高卧看浮雲

送廷珍殿丞兄通判閬州

十年京洛弄殘書  
喜見西歸別駕車  
錦里追遊貧莫厭  
綵衣榮侍樂何如  
詔條安遠民為本  
才刃如君地有餘

不日還趨宣室召伊川重訪野人廬

寄題傅欽之濟源草堂

傅公有幽居近在盤山下清濟出其間白石明可把盈  
科赴溟渤習坎日傾瀉竹色洗娟嬋松姿照蕭灑室有  
古詩書門無俗車馬公居雖畎畝寤寐惟朝社雲山聊  
嘯遨魚鳥同游冶在我本無心羣生繫用捨終當入帝  
夢肖象求巖野題詩寄林垌俚調慙非雅

范太史集卷一

欽定四庫全書

范太史集卷二

宋 范祖禹 撰

詩

和蜀公紫薇花再發寄中書舍人

幾年幽獨飽風霜  
一日榮觀似堵牆  
地養深根成異產  
天迴淑氣發新陽  
賓朋須醉千鍾酒  
蜂蝶爭偷百和香  
留得青鑪真舊物  
于今鳳閣有名郎

和五十四翁登恩第後贈楊君章

力穡良農晚歲收英名初喜動凝旒光如劍氣斗間沒  
文似河源天上流莫嘆黃金纔易幕安知布被不封侯

平津侯年六十  
方對策擢第

暮年烈士心方壯雙鷗搏風向九秋

孫秀才下第暫還京口留別起居邀余和以贈

行

翔鸞戢翼下層空南浦歸帆逐曉風夢寐蘭陔清露白  
嘯歌江國火雲紅玉纔結綬來無久天漢乘槎去可通  
莫為淹回銷壯節力行須與古人同



和蜀公八十歲自咏

衛武年將百僖公壽有千形方通帝夢兆始見王田白  
髮高山雪新詩清水蓮福綏真樂只燕處自超然濁酒  
中徐聖冷風御列仙勁松臨絕壁獨鶴在青天出處邦  
之望清虛性所便老謀方眷用微物正思憐漢室求園  
綺周家重天顛雖懷箕穎志應未許終焉

答孫莘老病中寄謝諸同舍

言有逆耳忠藥有苦口  
利康強本危慮憂患生逸意先

生蹈周孔陋巷樂仁義新命登諫垣四方想平治舞雩  
逐清奠伏枕送炎熾作詩存警戒教告在同志蒼生繫  
正人丹宸渴高議矧當敷經訓勸講日嚴侍桓榮大師  
尊鄭公三鑑備天衢進方亨王路坦無陂告猷補袞職  
正色伏蒲地陽城可以起醇酒毋數醉

春日有懷僕射相公洛陽園

關塞當門外伊流遶舍西松筠不改色桃李自成蹊  
簞筍穿堦迸珍禽拂面棲公歸卧林壑好作釣璜溪

和呂龍圖賀僕射相公

鼎鉉承家有慶基蒼生翹首聖神知  
韋賢世德傳經遠  
衛武年華入相遲霖雨八方隨說命  
帶河千古誓蕭規  
行看鳳沼原鵠集莫為旌麾滯朔陲

蜀公懇辭經席改領嵩宮賦詩以代獻壽

累詔褒優免造庭兩宮虛竚想儀形  
千年遼鶴高華表  
萬里雲鴻獨杳冥綺皓採芝終佐漢  
桓榮稽古舊傳經  
真宮岑寂煙霞外南極光中作壽星

和門下侍郎東省夜直寄左丞光祿

黃閣訐謨作帝龍

門下之職  
蓋古納言

文昌綱轄振邦風羣才藻

鑒歸能哲萬事鈞衡仰至公連璧輝光時共美斷金情  
契昔相同折衝千里精神壯正似山河繞漢宮

和子開從駕朝謁景靈宮

雨師汎灑霽光勻華蓋香風不起塵億兆歡呼真帝啓  
謀猷左右盡君陳雲隨仙馭三山遠日出咸池六合新  
一別都門變桑海來瞻原廟祗悲辛

瑤池真氣降東萊營室新臨渭北開載見辟王遐邇至  
思齊任如肅雖來龍胡尚泣遺弓劍燧火俄驚變柳槐  
誰識九重宵旰意中天雲漢望昭回

四月三十日慈孝寺山亭席上次韻經父舍人

送子敦都運待制赴河北

去年使河東飲餞天始秋今年使河北復作蕭寺遊愧  
我燕居息送公頻按州雍容鷗鷺列環珮鳴琅球豈知  
勤徒御與國揚王休譬如果適口安問梨與榴此行功

名會肯使歲月流載酒都門餞行當迓歸翰

同子瞻送子敦赴河北都運次韻

顧公涉滄海宇宙觀奇偉十年守沈冥應笑柱下史動  
靜雖有殊要之蓋棺已邇來拜東臺巖穴彈冠喜昂藏  
出風塵壯志在千里忽持膚使節急病仁為美翰林出  
新詩風霆奔落紙朝廷日清明君子慎所履行當繼禹  
功灑災澹洪水過我伊洛間松風醒俗耳

和張給事喜雨

玉座焦勞側席居，侍臣憂國盡應徐。  
宸心有感先離畢，星使分祈未下輿。  
觸石寸雲寰寓徧，稽天巨浸百川趨。  
不才太史那能頌，唯待豐年以喜書。

又和張給事喜雨

瞻望昭回每夜分，崇朝忽起泰山雲。  
乾坤蕩暑如醒醉，江海生波想織紋。  
禁漏深迷天闕曉，朝衣涼帶御爐熏。  
時清封奏何妨簡，獻納賡歌見愛君。

席上分韻送天覺使河東以登山臨水送將歸

為韻分得臨字

唐堯如藜藿民俗猶憂深晉國壯山川羗虜皆外禽宸  
心敬折獄使節慎所臨夫君臺閣舊空老翰墨林松柏  
飽歲寒鷗鶚候秋陰攬轡上太行北風爽煩襟當令桑  
棗地愁嘆為謳吟二江帶雙流三峨聳危岑何時早歸  
耕杖屨日相尋

謝賜御書詩五言十韻并序

臣今月十五日賜燕東宮伏蒙聖恩就賜御書詩



一首臣不揆荒淺謹賦五言詩十韻少謝榮遇之  
萬一謹隨表上進

聖志探淵學皇慈示至仁論經窮古訓錫燕比嘉賓天  
醴堯觴舉簫韶舜樂陳隆恩均近輔賜札下嚴宸灑墨

星辰爛飛毫日月新聰明欽作后氣志儼如神龍馬觀

犧迹

伏羲氏畫八卦始作書契

延陵識聖真

孔子親書有吳延陵季子字

受藏輝

節屋榮遇極儒紳方講三王治思還四海淳顧慙愚陋  
識何所補涓塵

殿試覆考和子由侍郎

十五年前宿殿廬伊川一紀卧巖居雕蟲尚憶長楊賦  
汗簡猶殘太史書日月當天瞻法座煙霞落紙看華裾  
品題幸預諸公末更許追隨侍玉除

和子瞻禁林鎖院詔賜燭酒

晨入金華暮浴堂聲容不動筆奔忙星間忽降龍銜耀  
天上重分玉醴香

是日早適英講讀退以風寒賜執政  
講筵官御酒是夜翰林又被燭酒之

賜欲爇寒宵宮漏永半酣歸夢蜀山長起看絳闕銀河

曉山立千官拱未央

送周思道再知漢州三首

千山行盡見平川  
雞犬相聞俗晏然  
父老共知仁聖意  
十年重借使君賢

使君昔日撫疲羸  
曾奏囊封有直詞  
一卧家山今白首  
重來猶擁舊旌旗

兩川相望各繁華  
二牧蕃宣出一家  
衣繡聊為鄉社寵  
行看召節向天涯

送周正孺知梓州

先朝直節貫秋霜，殿壁於今有諫囊。  
汲黯猶煩卧居郡，馮唐何事老為郎。  
山川壯麗開戎幕，草木榮華過故鄉。  
青蓋從來宜白髮，行看高步入明光。

寄題蒲氏清風閣

閨山錦屏秀，閨水碧玉寒。  
高閣俯城邑，飛甍出雲端。  
惟昔隱君子，卜築茲考槃。  
圖書侔藏室，一一手自刊。  
山園養松桂，庭砌被芝蘭。  
霧深豹文蔚，風壯鵬翼搏。  
來為廊

廟重歸為里閭歡乃知哲人訓基構自艱難我昔侍先  
君借書嘗縱觀題詩尚可記手澤想未乾爾來三十載  
感事一汎瀾側身西南望安得陵風翰

久雨中廚屋壞

我從山中來安宅豈敢卜窮秋積霖潦陋巷沒車轂環  
堵不蔽風下牀每塗足竈竈日已長釜魚時可漉瓦解  
豈一朝糞土扶朽木中夜若崩山微軀憂壓覆晨炊無  
尺椽慨嘆食重肉益思反蓬茅終老依松竹雲居蔭薜

羅野性狎麋鹿澗溪可濯飲薇蕨餘有藪寧惟此寓館  
薄宦同旅宿吾食敢求飽民生猶歎腹囊空庶無寇困  
竭尚有粟墨突不暇黔誰能憂破屋

寄題潁昌王氏巽亭二首

危檻跨層城憑高俗慮醒鵬飛適莽蒼鴻去上青冥隱  
地臨箕嶺賢遊會德星躋攀何日共遠目寄郊垌  
舊館懷賢躅先朝翊帝國虹梁引層構血汗出奇駒几  
杖延鄉老詩書問魯儒南天望雲氣應泣舜蒼梧

送道純歸南康

平生聞廬嶽夢想入松門京華走塵土歲月空崩奔  
思放巖壑枕石清心魂羨君歸舊隱山水當高軒雲林  
對寢食煙靄變朝昏晴空天池溢瀑布銀河翻竒觀窮  
宇宙夢澤可以吞少年負志氣海運期鵬鯤晚登桂堂  
籍燕石笑璵璠飄飄考城吏放浪彭澤園回首出都邑  
仙禽謝籠樊顧我老文史望天方戴盆俛仰半世間同  
僚念金昆存亡已永隔風義古所敦寄語謝嵇紹終慚

山巨源

珍臺閒館切昭回  
笙鶴應無俗駕陪  
天浸祥池三島向  
春迷神囿百花開  
沙鷗汎汎人相近  
風燕飛飛隼莫猜  
清洛故園荒徑在  
與君何日賦歸來

同安誕日賦小詩祝延

海上蟠桃方結子  
月中仙桂欲生枝  
須知陰德多餘慶  
仁者從來與壽宜

闕



又

奕世登公衮羣生入化鈞須知盛德後宜有正家人令  
日垂門悅清風采潤蘋兒孫環坐側歲歲祝千春

送呂通直致仕南遊歸壽州

挾天疇昔阻雄飛未及耆年早拂衣白日浮丘仙袂遠  
清秋范蠡片帆歸京華歲月雙奔轂淝上滄浪一釣磯

況有孟光為道侶散花諸國叩巖扉

答劉中叟

十年卧伊洛半世老鉛槧君恩還故棲蠹簡幸窺覲濫  
陪英雄遊自覺山野僭有美劉夫子相逢樂無厭騰騫  
入霜臺便若阻城塹朝言渴蹇諤民瘼待鍼砭清詩叩  
哀玉孤秀出羣艷伐木激頽風佩蘭起幽念顧我久羈  
寓來如水鳧泛晨興想三川夕夢越雙劍終當出都門  
瘦馬搖破韉事業付公等斯言免為玷

和劉莘老贈王聖美三子姪補試太學聯中高  
等

風流江左並淮原  
王氏衣冠不乏賢  
文似三珠才競爽  
名如羣玉氣相連  
九秋鴻雁方遵陸  
萬里驂騑始下鞭  
白髮星郎推雅量  
似聞折屐喜成顛

黃魯直示千葉黃梅余因憶蜀中冬月山行江  
上聞香而不見花此真梅也魯直然余言曰  
不得此樂久矣感而賦小詩

江上清香隔水聞  
林間不見雪紛紛  
春寒忽憶登山屐  
歸夢猶尋谷口雲

水紋扇

翦出瀟湘一片秋  
動搖君手向空流  
微風自有雲濤氣  
夢入江天一釣舟

寄蜀州吳廷珍太守

紅旂前驅一舍間  
里閭相望俗安閒  
春風城郭千家柳  
落日樓臺四面山  
南畝勸耕丹詔遠  
北堂侍膳綵衣斑

梁園倦客思歸久五馬何時命駕還

臘後一日雪晴西郊

臘後寒威壯春回歲律窮薄雲霏小雪愛日解嚴風銀闕千門迥瑶林萬里同誰能拂毫素移入畫屏中

寄華州提舉崇福李侍郎

洛社曾陪祭酒閒承明復接侍臣班論交晚見松筠操  
駐景長思冰雪顏純之服兔絲老而有少容華嶽閉門窮簡冊來書云閉

門讀書所樂甚多

邵堂隱几看河山相逢一笑知何日心逐飛

雲出故關

李方叔饋潭筍

穿雲剝石遠林空，來涉烟波幾萬重。  
實比梧桐堪食鳳，籜翻風雨便成龍。  
一枝未許塵鞍掛，千畝終留渭水封。  
陋巷菜羹知不稱，君王玉食願時供。

和李方叔惠嵩山朮煎松黃

八公淮水留丹竈，四皓商山餘紫芝。  
嵩嶺今成花鍊朮，周原空詠董如飴。  
容顏冰雪端能變，心肺塵埃信可治。

多病直疑生羽翼更紆仙客上清詞

右木煎

直幹千年老雪霜不隨羣木四時芳  
冥冥黛色凝寒碧冉冉雲英末嫩黃  
仙桂一枝聊比德幽蘭九畹幸同香  
移文應怪歸來晚安石東山興未忘

右松黃

石耳

廬山五老峯下臨大江水絕壁千餘仞  
青冥洞無底烝

雲自太古流雨灑千里  
日照層巔陽崖生石耳  
採之懸繩梯磴薛滑履  
齒朱門登華筵味敵蓴  
絲美小人勇趨利所得  
僅刀匕鴻毛輕軀命一墜  
即已矣吾思室羣欲豈  
獨良其趾高深有前戒  
來者慎所履

范太史集卷二



欽定四庫全書

范太史集卷三

宋 范祖禹 撰

詩

和張芸叟左司被賜資治通鑑

六世承平有史臣

班固稱六世史臣謂司馬遷

細書東洛布成均網

羅遺佚三千載採擷精華十九春天作冠篇墳典大上

思稽古憲章新烏臺御史辭讐校頭白空餘汗簡人

芸叟

同校定以執憲先罷

送鄭閔中待制提舉洞霄宮

成均祭酒出儲胥嘆息東門祖二疏顧我言非韓吏部  
多公節似孔尚書諸生共惜陽城去三徑重開蔣詡居  
琳館遙瞻霄漢外秋風一鶴上空虛

和呂原明上清宮落成

炎歷儲祥億萬年宮成四海共熙然玉虛真境朝羣帝  
金闕冷風下列仙初日翠華來照耀半天碧瓦欲飛騫  
已瞻聖孝勤三殿

有司定儀本命殿遣官分獻  
是日有旨親獻三本命殿

更寫歡

聲入五絃

送李邠州

文昌冠劍輟名卿  
書殿丹青得老成  
曉日旌旗熊虎動  
秋郊組練雪霜明  
邠郊風教農桑國  
秦帝山河屏翰城  
竹馬兒童應借問  
使君攬轡舊澄清

和門下相公從駕視學

堯天雲漢炳文章  
親學嚴師款上庠  
萬乘及門先降輦  
諸生望日儼成行  
三雍盛典遵前訓  
千古元龜鑒逸王

儒服觀光真幸會為容深愧魯高堂

興龍節傳法院譯經御筵

誕聖千年日祈祥億劫尊秘言翻貝葉勝事集祇園寶  
蓋天香住銀璫詔語溫曾無了義學空愧酌堯樽

送文周翰出守陝郊

維師謝公衮稷契仰高躅公子睠庭闈西郊作侯牧飄  
飄丹穴鳳燦爛文昌宿雅望冠朝端妙年分陝服綵衣  
照洛水紅旆驅崤谷荆山連太華翠氣堆羣玉長河從

天來迴幹卷坤軸東奔觸砥柱北向摧平陸壯哉山河  
固屏翰神明隲秦人亦勞止生氣日已蹙兵戈困瘡痍  
賦斂苦敲朴使君得召父庶可飽饘粥耕桑徧南畝禮  
義興比屋門前長安道日夕擊征轂念昔西徂東經過  
厭結束爾來卧巖谷十載歸天祿猶如閑樊籠恨未隨  
鴻鵠隱几思故山側身望喬木何時拂塵衣假道西走  
蜀駐馬問甘棠歌謠聽淳俗

守歲

歲逐更籌盡春隨斗柄迴和風先傍柳薄雪暗驚梅坐  
對燈花結歡吹酒蟻開莫嗟華髮短且喜一年來

和呂子進元夕

何處元宵好天街第一坊九重金闕外萬壽綵山旁扈  
蹕凝祥島十四日迎鑾資善堂十五日帝城燈火滿歸坐若

禪房

原明官閒以余兼職良苦作詩見勞次韻二首  
忘言象外已無求應物環中自不憂匠石旁觀傷手斲

尚應皮裏有陽秋

右原明

野性從來麋鹿遊，強加冠服祇為憂。  
何時放出樊籠去，

定似飛鴻上九秋。

右言志

送秦主簿赴仁和

我思適吳越，懷古意如何。  
太伯振高風，仲雍揚清波。  
緒餘有季子，飢食玉山禾。  
山水發奇秀，古來英俊多。  
秦君淮海彥，文鋒雄太阿。  
早依蘓揚州，匠手為礪磨。  
光芒侵星斗，氣象奔江河。  
青衫拾科第，試邑佐絃歌。  
春水生南

國扁舟浮綠羅方將剖蚌璞焜耀隨與和我病久廢詩  
緬思眇庭柯傍徨戀紫闥歲月屢蹉跎看君登朝廷奏  
頌助猗那為我謝蘇公先歸待江沱

和錢穆父尚書蔣穎叔侍郎從駕景靈宮二首

紫嵩清洛映重闥

紫嵩清洛  
西都二館

舊隱荒蕪白髮新麋鹿未

能馴野性鸞凰何敢望前塵分班拜舞趨文陛扈蹕賡  
歌紀慶辰共助成王朝太室慙非史佚奉明禋

寢廟威神挾正元

天興殿左右  
門名曰正元

初晨天仗下端門寒生



碧瓦氣葱鬱日麗琬與景晏溫霜露感時知世遠星辰  
拱極見君尊自憐多病思歸客唯有山川役夢魂

子瞻尚書惠涵星硯月石風林屏作歌以送之

賦十二韻以謝

端溪千仞涵明星號山木古藏陰靈蘇公贈我此二寶  
使我坐卧瞻雲屏我觀天地間有物皆流形或從清空  
入幽谷中夜隕石翻堦莫齊諧志怪不能狀欲說但恐  
同優伶公遊浙江探禹穴長嘯宇宙臨滄溟手攀天河

弄星月醉落大筆還微醒故分星月入我室光照窗戶  
風生庭長林偃絕壁晚色寒青冥似聞洪濤卷萬木直  
幹不折當風霆玄雲欲落雪夜久孤燈熒報贈愧無青  
玉案苦吟徒使鬼神聽

送蔣穎叔赴熙州

詩書謀帥得豪英去擁洮河十萬兵舒卷風雲為號令  
笑談樽俎是功名胡塵不近彈箏峽漢月長懸細柳營  
莫謂安邊無上策農桑千里見昇平

和王都尉押高麗人燕射北園

天上星弧日射狼副車衣袂得餘香朔雲曾落雙鵬羽  
遼海將歸萬里航酒灑堯觴賓已醉春迴漢苑漏初長  
何郎拜舞恩波渥花簇金鞍道路光

謝子瞻尚書惠墨端溪硯二首

禹平洪流錫玄圭班于羣神朝會稽遼東飛煙過滄海  
徂徠古氣臨天齊丹砂化出黃金鼎雄麝焚身何噬臍  
魚膠清堅豈易致燕支山北隨佩觿雙龍蛇蟠戲缺月

吳軍破甲光水犀黑雲如輪起端溪揮灑倏忽奔鯨鯢  
先生海內文章伯窮年蒿目憂黔黎玉堂新製自心巧  
想見星象躔寶奎落毫無脛走珠玉雨雹霽止垂虹蜺  
陋儒窮經屑欲腐石室汗簡空沈迷眼昏畫紙僅成字  
何異月闇投玻璃唯當藏作篋中寶併荷蓑笠歸鋤犂

右墨

端溪清寔幾千尺玄潭噴雲噓紫石層空飛溜瀉珠璣  
大古陰崖摧霹靂翦裁巖屏作風字琢磨水鏡成月魄

似聞松上颼颼聲一洗塵埃傾七澤先生每思窮禹穴  
東叱天吳掛帆席山祇水若獻幽寶贈我不啻千金璧  
玉堂金井汲寒泉坐視青天浸虛碧豈知來從海嶠外  
鳥道穿雲下絕壁嗟我本是山中人慙無詞藻對卿客  
鄉人子雲思竒苦終老漢庭長執戟至今舊宅有墨池  
何怪著書玄尚白行當提攜返敝廬更廣牢愁弔遺迹

右端溪硯

初到玉堂

舊廬風雨暗柴荆  
丘壑元無紱冕情  
一紀周南陪太史  
八年書殿廁桓榮  
陳編豈待傷麟止  
藻思那能倚馬成  
空愧朱衣華髮吏  
玉堂三世見題名

院有老吏嘗引接  
叔祖忠文公叔父

資政今又  
引接入院

### 翰林寓直

雨冷絺衣初覺單  
清秋寓直玉堂寒  
濛濛宿霧昏鷓鴣  
獵獵光風轉蕙蘭  
蘇積書筠塵不落  
雲生硯水墨無乾  
十年曾向伊川卧  
長憶閒中夢寐安

夜直聞御溝聲

銀河秋瀉月明中  
雲卷風吹下碧空  
終夕玉堂魂夢冷  
蜀江聲繞水晶宮

送陳元興侍御赴廬江

憶昔仁皇憑玉几  
延和春晝神龍起  
赭袍黃傘放諸生  
却下紅簾半天裏  
君為第二驚衆人  
愧我非才居後塵  
題名桂籍皆年少  
有似鶴鴻毛羽新  
爾來四朝三十載  
相逢何怪容顏改  
昭陵拱木鬱參天  
麟閣名臣幾人在

侍從同登白玉除  
每思夙昔夢華胥  
君今出作八州牧  
千里旌旗引舳艫  
淮陽卧治豈當久  
宣室夜召終非踈  
下車先表崔節婦  
助我汗簡成新書

包孝肅公崔節婦居廬江

八月十一日夜玉堂對月

銀雲櫺櫺玉堂明  
奩鏡初開六合驚  
天卷纖毫光不隔  
風收萬籟夜無聲  
蓬萊想像皆雲氣  
宮殿虛無盡水精  
一夕夢飛雙劍外  
已疑身到雪山清

送七主簿赴龍水



山行水逶迤鬱屈如盤龍緣谿夾修竹被嶺多長松懸  
門倚巖石終日對青峰初仕昔為宰讀書過三冬忘機  
狎鷗鳥勸稼親老農訟庭可羅雀銅印蒼蘚封爾來三  
十年夢想幽人蹤風塵京洛間邑子或相逢晚歲上玉  
堂天門深九重緬思寒潭碧一洗我心胸送子西南歸  
恨無羽翼從為我謝邦人今愧白髮容

和子瞻尚書儀曹北軒種桔

蘇公滄洲趣日夕懷山陰公堂植珍木寄夢天姥岑亭

亭碧玉榦氣象俯喬林雷霆已難拔霜雪何敢侵蒼皮  
卷鱗甲細葉抽鋒鍼稍出珊瑚枝中含笙磬音鸞鳳待  
棲息詎肯容凡禽西風蕩積雨畏日方流金潭潭宗伯  
府窈窕巖谷深北窗卧羲皇笑語合朋簪蒼生望安石  
出處本無心萬象入毫端四溟納胸襟文房俎豆列武  
庫矛戟森甘棠愛召伯勿使螻蟻尋世俗多貴遠豈知  
古猶今他年老東山應記梁父吟

吏部彭侍郎召會馮少師園亭卽席賦詩

門生猶記鑿龍登載酒東堂命友朋終日清談陪几杖  
赤松況是坐禪僧

多病

多病心牢落驚秋髣颴然風乾桐葉地雨冷菊花天  
舊隱荒江漢新居俯澗瀍西都長夢想何日賦歸田

成都西都

九日寄諸弟

白髮宜新酒黃花似去年懷歸雙劍路極望九秋天  
喬

木西山外觚稜北斗邊遙知行樂處藥市隱真仙

闕

綵旆藍輿訪隱局雲松雪竹想儀形  
函關應望真人氣  
傳野今無處  
土星猶憶九臯聞  
鶴唳徒勞雙目送  
鴻冥  
將迴俗駕頻搔首  
深愧山文舊勒銘

永州作

京華驛候遠楚越山川分心馳桂江水夢繞蒼梧雲  
夕與木石居朝遊麋鹿羣聖治踰繩契皇明軼華勲  
炎陬

暨海表休氣塞無垠羈臣此幽繫何以答恩勤

御製太皇太后挽詞四首

任如基王迹塗莘首化風德超千古上治定九年中日  
月無私照乾坤不宰功寧神登太室永佑宋無窮

定策元豐末勞謙聖烈光外家深自抑俊德盡明揚恭  
儉隆三世寬仁覆萬方功成身不處仙駕白雲鄉

天祐周邦世世仁篤生文母濟斯民嗣徽慈后光宗祖  
配極英皇育聖神崇慶垂衣寧寶座延和負宸翊沖人

長言永慕遵遺訓要在齊家與正身

八荒同軌壽原成雨露俄悲歲律更曉日瞳矐開鳳翼  
春風縹緲轉龍旌晨朝尚想趨金殿颺馭難留返玉京  
寶冊形容雖四字誰知盛德莫能名

臣奉御寶批撰挽詞四首進入內兩首七言兩首五  
言謹依聖旨撰進

古今詩體多以五言在前伏乞裁酌

太皇太后挽詞二首

誕保天基命光開帝永圖軒星臨斗極堯日上雲衢美  
化形風雅成功入典謨羣生何以報損壽濟衆區  
授几咨元老垂帷攬衆賢舜功成二十周士得三千德  
澤流終古規摹遺憶年寧唯照彤史石室爛青編

又三首

九載扶皇業三朝賴母儀成乾功不有並日照無私天  
上軒星暗人間薤露悲君王自仁孝舊典奉元龜

治道初無事齊家與正身練繒躬至儉行葦被深仁受

冊辭隆禮為霖屬老臣  
太平遺德在白首泣堯民  
能助君成聖惟知諫必從  
徽音推二后盛治見三宗  
虛宸翔丹鳳仙輶駕玉龍  
淒涼厚陵路墓木拱高峰

王岐公挽詞三首

景運光華際洪鈞十六年  
文明憲前古禮樂被敷天  
有美經邦業無成載物權  
易曰地道無成而代有終  
君臣時契會俯仰

逐流川

乘雲仙馭遠出震帝圖  
新百辟瞻元宰繁機仗老臣中



天扶日月拱極失星辰終始先朝遇勤勞至沒身

王儉風流相岐公博瞻資

唐相杜祐封岐公

敷文成國典亮采

作官師劒佩空黃閣音容想赤墀元臣葬禮盛簫吹朔  
風悲

王開府挽詞三首

聖歷當千運天庭第一人榮光親日月優寵極臣鄰賈  
馬推先進夔龍接後塵藩垣賴耆德宣力至終身

康寧五福備出入四朝安劒佩逼台室旌旄登將壇天

池將浴鳳雲漢擬驂鸞縹緲凌霞意今成逝水嘆  
連帥諸侯長維師列爵隆儀刑憲萬國眷禮視三公白  
日年華盡浮雲世事空九原伊洛上松柏自悲風

司馬溫公挽詞五首

伊呂為時耦夷齊得聖清精忠貫日月至行格神明微  
物霑仁澤窮荒服德名須知千載後瞻仰重嵩衡

文母扶皇運成王紹慶基蕭公翼左右裴相繫安危共  
恨登庸晚俄成殄瘁悲旂常紀勲業長與日星垂

上相經綸日羣生化育中初開仁壽域重立太平功海  
寓還淳俗朝廷復古風英靈在王室應佑宋無窮

盡瘁憂民瘼孤忠簡聖心忘身甘首疾報國競分陰天  
奪楊公速人思召伯深秋風咽笳鼓行路泣成霖

自昔龍門峻叨蒙國士知紬書陪太史問學仰宗師一  
紀依林壑千秋隔履綦餘生愧簪紱無路送靈輶

韓獻肅公挽詞三首

孝友天生德公忠世象賢八元推亮采四海入陶甄粉

社棠陰老槐庭棣萼聯誥詢賴黃髮零落已重泉  
舜禹勤勞治臯夔翊贊功秉鈞瞻上宰憲老佚三公壽  
考登耆耄衰榮備始終淒涼潁川路簫鼓愬南風  
東閣開無倦西園宴不疲蒼生望安石多士美當時功  
業歸青史音容闕總帷烏衣門巷在過客有餘悲

李朝議挽詞二首

美行商山老高年渭水翁政留循吏跡家有古人風操  
几門庭在安車里巷空子孫皆孝養餘慶自無窮

解組紅塵外忘機白日遲煙霞隨步武松竹想風姿  
沈水流清範盤山厚福基鄉人應配社猶恨不期頤

鮮于諫議挽詞二首

西蜀文章老中朝侍從臣諫垣風烈在書殿寵光新  
宣室虛前席清漳嘆病身致君才未展青史迹空陳

白首方登用忠規溢皂囊仲山違袞職汲黯卧淮陽  
墓劍知誰掛人琴竟兩亡猶思挺直操松柏凜秋霜

哭司馬公休

昔在西都日趨庭見伯魚金華同勸講石室共紬書鮑  
叔深知我顏淵實喪予衰年哭心友忍復望靈車

中書侍郎傅公挽詞

巖野為霖後千年復有人累朝推鯁直二聖倚經綸盡  
瘁憂民色孤忠許國身徐公德不變可使俗還淳

洛社瞻賢躅書筵繼老成

公昔免講改侍讀  
祖禹承乏是職

聲容陪夙

昔論議想平生節與盤山峻名隨沅水清草堂空舊隱  
松月為誰明

常大夫挽詞

禮樂追先哲  
文名動搢紳  
忠勤白首節  
惠愛遠州民  
石室詩書在天衢  
日月深九原  
何所憾有子嗣芳塵

王承事挽詞

井絡西南興  
今無處士星  
天真養恬漠  
世界累絕塵  
冥松菊陶公徑  
詩書孔氏庭  
傳家清訓在  
潛德繼先銘

先生  
考官

教蜀郡忠  
文公為銘

范太史集卷三



欽定四庫全書

范太史集卷四

宋 范祖禹 撰

表狀劄子

辭免兼侍講狀一

元祐元年九月

右臣準閣門告報除臣兼侍講者臣伏以邇英勸講職  
參近侍必得耆哲之士端方之人日新輝光仰備顧問  
臣語學則不足議行則無取承命愧恐不知所為矧今  
名儒碩德並在左右啓發聖學不無其人而臣自知最

為淺陋頻蒙識擢未有報稱輒玷茲選實非所堪恐無  
補聰明之萬一適足以累朝廷之公舉乞還誤恩庶厭  
清議

二

右臣準尚書省劄子奉聖旨不許臣辭免兼侍講者臣  
不惟學不稱職恐無以塞責而義有未可不敢不言伏  
以陛下深居九重不見聲色唯以大公至正身先天下  
進退黜陟以明好惡將使人知廉恥興禮義也至於風

俗厚薄人情美惡則凡為士者皆預其責是以臣之素  
心官不敢虛受利不欲苟處恐傷廉恥則敗風俗上累  
國體罪之大者也而臣擢於小官無尺寸之長暮歲之  
間荐蒙褒序史闡紀實濫備討論經幄敷言復俾陪侍  
雖陛下選用義不及私而臣有姻戚之嫌敢不自列臣  
妻父呂公著方秉國政雖在臣職業所不當避而於臣  
情分則有未安竊恐仰累至公下負夙志豈可冒昧先  
諸儒而進乎伏乞聖慈特賜矜察追寢成命庶使迂拙

少安分守臣不勝拳拳之愚謹再具陳免以聞

實錄院乞避親狀

右臣伏睹已降敕命差尚書右僕射呂公著提舉修神宗皇帝實錄伏緣公著是臣妻父於條合該迴避伏乞罷臣檢討之任謹錄奏聞

乞給假至潁昌狀

二年六月五日

右臣伏為臣親叔祖端明殿學士鎮行年八十居潁昌府多苦腹疾近以次子喪亡憂傷尤甚臣之私情實所

不安欲望聖慈特賜給假旬日暫往省見不敢久妨職事謹錄奏聞

謝賜銀狀

右臣伏蒙聖慈以臣請假往潁昌府特降中使宣問賜臣銀一百兩臣無任感天荷聖激切屏營之至

奏知狀

右臣今月十一日入內內侍省內侍高班李正臣至臣家傳聖旨以臣請假往潁昌府賜臣叔祖鎮實封御前

文字一封實封銀合一具令臣齎賜臣已依聖旨收領  
謹錄奏聞

奏為將到臣叔祖鎮謝恩表狀

七月

右臣昨蒙給假往潁昌府準中使傳聖旨賜臣叔祖鎮  
實封詔書一道龍茶一銀合因令臣宣問臣今將到臣  
叔祖鎮謝恩表二道詣通進司投進

謝講論語畢賜燕表

九月

聖人之言高弟所記王者之事大學為先永惟百世之

師實首六經之訓顧慙謏陋侍清閒方迨終篇曲蒙  
猷賜恭惟皇帝陛下務學時敏作德日新親邇儒臣懋  
昭聖志以為舉直錯枉則萬民咸服克己復禮則四海  
歸仁取法於堯必則天之惟大思齊於舜當恭己以無  
為尊其所聞終之不倦式頒禮食昭示龍光臣等咸備  
邇聯預霑慈宴屬厭知愧盡瘁為期

又謝賜御書詩表

宸暉照爛聖札飛騰拜手受藏震驚喜抃臣聞孔子稱

堯之德曰煥乎其有文章書稱舜曰濬哲文明詩美文  
王曰倬彼雲漢為章于天周公多才多藝孔子將聖多  
能論語曰志於道據於德依於仁游於藝書即六藝之  
一也古之聖人莫不以好學為先游藝為美恭惟皇帝  
陛下聰明天縱睿智日躋嗣膺大統于今三載間御便  
殿延對儒臣敷求經訓啓發聖學雖大冬盛夏肄業不  
輟臣竊觀陛下容止周旋動必中禮垂拱淵默性唯合  
道終始如一日進無疆四海之人方翹首以望輝光之



新傾耳以聽問譽之隆然在廷之臣未有被親札之賜者臣以末學濫備勸講適終篇帙無補涓埃預蒙優恩加賜燕勞忽頒宸翰獲覩飛毫乃知陛下閒燕之中留神筆畫研精儲思欲臻其妙臣願陛下篤志學問亦如好書益進道德皆若游藝則聖神可至事業可成如天之積高地之積厚廣大深遠不可測也臣不勝拳拳之愚敢以此謝謹當傳之子孫以為永寶夙夜思職少圖報稱

謝開寶錄院賜燕表

三年三月十七日

編摩云始燕衍遽頒祇荷詳延伏深震懼臣聞繼志嗣  
訓以為孝記久明遠莫如書先帝之御萬方僅踰七閩  
信史之示後世動流億年顧以頑疎誤當屬任和鉛就  
職未知書法之謂何折俎示慈亟荷聖恩之特異均頒  
有核詔集搢紳事雖故常寵實優渥此蓋伏遇皇帝陛  
下紹承先烈祇遙燕謀瞻望西陵永悼威神之不復論  
著東觀將傳功德於無窮曾未濡毫特先置醴徒重大

官之費豈有良史之才思稱所蒙敢忘自竭表裏詩書之策為法具存畫繪日月之光強顏何已

謝太皇太后表

信史誕修恩筵顯設仰膺寵獎內切兢營伏以先帝之盛德成功羣臣之嘉言善行將傳永久爰命討論敢意屏虛遽叨屬任龍湖已遠強圖日月之光鼠技未陳猥被雲雷之施此蓋伏遇太皇太后陛下思光往緒垂裕來昆睠茲傳信之勤加以示慈之厚編摩代置雖有玷

於甄收尊閣視成庶無慙於器使

謝開寶錄院賜銀絹表

紬繹信書方謹編研之職分頒厚幣遽霑優渥之恩拜  
賜無功受藏有覲此蓋伏遇皇帝陛下纂隆下武追孝  
前文仰惟丕顯之謨莫重不刊之典將以示億年之永  
久齊列聖之休光顧忝司存誤膺詔委眷開編而首事  
加寶篚以示慈才之三長方懼曠官之責恩均九式實  
叨懋賞之私冀竭微勤上酬鴻施

謝太皇太后表

職當載筆方紬垂世之書賚及有家忽降自天之澤便  
蕃所被惕厲靡寧此蓋伏遇太皇太后陛下勤治萬方  
詒謀億載保佑重光之祚緝熙前烈之文申敕攸司發  
揮大典顧循譎薄誤玷選掄眷茲簡冊之初優以金繒  
之賜先事後得慙勸賞之遽加廣記備言唯服勞而仰  
報

謝開寶錄院賜硯墨筆紙表

典司太史論次新書顧在諸儒已塵盛選遽拜出中之  
賜策深載筆之榮此蓋伏遇皇帝陛下茂烈謹於丕承  
達孝資乎善繼發揚先帝甚盛之蹟圖示萬世無窮之  
傳以臣等預遊著作之庭並給上方之札抽毫執簡使  
備於編摩挹槩和鉛適資於潤色將何報稱祇益兢慚  
思繪畫於乾坤固知不可裨涓塵於海嶽勉竭所能庶  
集微勞少酬洪造

謝太皇太后表

伏以發揮天地之功潤色聖神之業自昔文章之用序  
事尤難方今儒學之官紬書為貴顧漸譴陋輒冒詳延  
屬藁云初拜嘉有腴此蓋伏遇太皇太后陛下垂精大  
典貽訓後人發禁省之珍藏循書林之故事陰山堅石  
之璞上黨芳松之煙妍妙眩光水苔之質圓和正直秋  
兔之毫曲示優恩併推異數寵靈甚渥報稱謂何誓殫  
夙夜之勤少答寵光之厚

辭免除起居舍人狀一

四月

右臣今月二十日準閣門告報已降告命特授臣守起居舍人者臣竊惟左右二史選擢尤重文學之士號為顯塗方陛下延登衆賢式序在位臣以非才謬塵書省同時並直前輩猶多而臣幸得執經日備顧問夙夜惟念無補聖學其敢過貪榮寵以速罪戾伏望聖慈收還誤恩旁求俊良副茲慎簡如臣淺陋實無以堪所有告命未敢祇受



右臣準尚書省劄子奉聖旨不許臣辭免起居舍人者  
承命震恐不知所圖臣以侍經職在左右豈敢過為矯  
飾煩瀆至於再三直以誠實上千天聽伏念臣賦性樸  
愚臨事不敏往在書局十有五年不敢有榮進之心述  
史之餘粗不廢學至於詞藻實非所長是以前此蒙恩  
除授著作檢討乃至經筵兼職苟可勉強不敢固辭今  
蒙陛下擢寘西省俾之執事記言日侍殿陛臣不唯非  
才無以當此美職竊聞舊例中書舍人若值假故則以

次記注之官當權草制臣實無敏疾應猝之才不敢以  
所不能貪冒天寵黽勉就命瘝官塞職為罪滋大是敢  
先事自列不避重誅況臣著作已為史官勸講亦參近  
侍敷陳經訓以承聖問常懼不足敢有二事以及其他  
伏望陛下矜察特賜寢罷今來恩命臣謹當窮思竭精  
專意所職庶有微益不負聖知

三

右臣近兩具奏辭免除臣起居舍人恩命準尚書省劄

子奉聖旨依前降指揮不許辭免者臣非不知煩瀆聖  
聽稽違君命邦有常刑然臣以才性遲鈍不能及人竊  
自惟念累年以來荐蒙褒擢未有報稱今茲進職漸階  
近侍實懼無以堪任伏望陛下察臣肺肝令臣且守舊  
職責其報効若臣樸學少有補於聖德在臣所願勝於  
遷兩省之職多矣所有告命臣必不敢祇受伏乞早賜  
俞允

四

右臣準尚書省劄子奉聖旨依累降指揮不許臣辭免起居舍人者聖恩深厚無有窮已非臣隕首所能上報重念臣實以文字遲澀不工如前所陳乃其平時素心不敢冒昧由此以進臣今若就職將來或未以罪斥則文字之任無說可辭若謂今日可以且受而俟他日堅辭則是臣緣此美職以為進取階梯然後却辭他日差遣懷利事上不唯臣所不敢陛下亦何所用之伏望聖慈察臣至誠實非矯激特賜追還所授免更辭費上瀆

睿聰臣無任兢惶迫切之至

申三省狀

右某近準閣門告報蒙恩除授起居舍人前後已具四  
奏辭免備述誠懇決難祇受伏乞特賜敷奏早降指揮  
追還告命免至辭費上瀆朝廷謹具申三省伏候裁旨

五月八日三省同  
奉聖旨依所乞

請假往潁川狀

元祐四年二月七日

右臣有親叔祖故端明殿學士贈右金紫光祿大夫臣

鎮不幸考終卜以今年三月一日葬於潁昌府陽翟縣  
臣欲暫請朝假旬日往赴襄事不敢稽違以妨職業伏  
望聖慈特賜矜允

辭免召試中書舍人狀一 三月

右臣今月十四日奉聖旨召試中書舍人者聞命震恐  
不知所從臣以凡才謬塵史職復緣樸學進侍經帷至  
於文詞實非所工今茲給札以備代言之選大懼無以  
厭塞士論輝光帝猷兼臣昨已辭起居舍人之職今不

由記注直俾試言天恩過隆弗循舊典在臣愚分豈敢  
克當伏望聖慈特賜寢罷召試指揮臣無任祈天俟命  
懇切之至

二

右臣今月十六日奉聖旨不許辭免召試中書舍人者  
伏念臣昨蒙除起居舍人非敢辭記注之官實以文詞  
不工竊恐誤被書詔之選故不敢冒昧榮寵乃是辭今  
日之試也陛下不以臣為非才特降召試之命臣若就

試則寧如前日勿辭且前日之辭是則今日之試非今日之試是則前日之辭非前後相違何以事上臣雖至愚實不遑處伏望聖慈察臣懇誠特賜寢罷今來指揮庶安分守敢不畢命以報聖知

辭免除中書舍人狀一

右臣近兩具奏辭免召試今準閣門告報已降告命除臣中書舍人者非常之恩不試而授震懼殞越無所自容臣伏以祖宗以來用人有序必記言動乃司訓誥舉



以次則人不競取以試則下不偷所以示名器之公嚴  
侍從之選踵為故事未之或渝唯是文章宗工人望久  
屬館閣舊老士論共推或絕倫之才躡等而進不待試  
可曾無幾人以臣方之何能為役况乃辭記注而特召  
辭召試而直除何以厭服人言答揚聖選而復遂格召  
旨又隳故常啓僥倖之途喪廉隅之節皆自臣始誠何  
敢當伏望聖慈察臣悃悞追還新命俾安分守免更瀆  
煩天聽愈重罪戾

二

右臣近上奏辭免除授中書舍人恩命準尚書省劄子奉聖旨不許辭免者竊以內史文學之選號為清華秉筆之士無不願慕臣遠方孤生讀書仕進心非木石豈不求榮況自臣叔祖臣鎮叔父臣百祿皆由科第歷踐此官今臣非才復被誤恩若一日就職遂為三世掌誥豈非寒族之寵小臣之幸實以詞學荒落才力有限久脩修書之職復參勸講之任粗容樸拙勉冒居昨蒙

選授右史非謂不能記錄言動正恐循次而進用承人  
乏是以先事瀝懇至於數四及召旨期於必辭不圖天  
恩更越倫等重念臣始辭記注實辭召命既辭召命實  
辭此職今若祇受自食其言前之所辭皆為虛矯豈唯  
愚臣心知不可實亦清議皆所不容伏望聖慈矜察本  
末早賜追還新命

辭免除諫議大夫狀

四月

右臣今月四日準閣門報已降告命授臣試右諫議大

夫兼侍講充實錄修撰者聞命震恐無所自容臣聞三代之時自公卿至於列士皆有諫職降及後世乃特置官祖宗以來尤慎此選必得忠正之士骨鯁之臣言足以廣君心學足以知治體乃不誤於耳目而有補於聖明苟非其人無以重國臣識智淺陋心力衰疲受恩不貲無裨毫髮近蒙選授內史榮參法從臣愚竊欲專勸講之任不敢復兼書詔之職是以不避煩瀆至于懇辭伏蒙天恩曲徇誠請不圖求諫之廣下及芻蕘擢寘西

省責任愈重大懼無以補衮職之闕塞搢紳之望內自  
揆省實非所堪伏望聖慈特賜追寢令臣且守舊職所  
有告命不敢祇受

謝諫議表

五月

從大夫之後以諫為稱近天子之光唯言是職顧漸譴  
陋深積兢惶伏念臣識智甚愚資才不敏久玷道山之  
籍獲趨便坐之班入則執經奉一人之典學出而紬史  
紀先帝之成功非堯舜不敢陳於前庶文武尚未墜于

地螢爝無裨於日月涓塵何補于山淵已叨儒者之榮  
復被爭臣之選付之言責寵以服章俾圖報國之忠未  
識隕身之所此蓋伏遇皇帝陛下聰明時憲聖敬日躋  
體軒皇敷敏之仁躬帝嚳靜淵之德思聞謹議深沃清  
衷兼收一介之微進備七人之列重念臣自陪經席日  
侍威顏曾無稽古之能每荷虛中之聽唯畢精而竭慮  
嘗廢寢以忘餐矧今眷遇加隆事責彌重敢不益厲自  
公之節不移介石之誠冀畢餘生仰酬鴻造

謝太皇太后表


后從諫則聖俾服在於邇僚臣責難曰恭敢不祗於休  
命覲顏而受思職惟憂伏念臣遐遯孤生顯愚懵學賜  
第仁皇之末紬書神考之初天祿三年周書一紀唯弊  
精於蠹簡敢覲幸於榮塗迄奏終篇召寘儒館荷大德  
之廣覆兼收細微屬睿明之統臨旁燭幽隱史闡記實  
濫備討論經幄敷言復參陪侍負戴有丘山之重勤勞  
無毫髮之微擢右史之華資進西垣之近職皆從懇避

特出矜容竊希散秩之安乃被爭臣之選朝無倖位義  
不辭難仍服不稱之衣越處非據之地此蓋伏遇太皇  
太后陛下母臨萬國坤載羣生思齊任如之功誕保成  
康之聖建大公而在上登衆正以交修明目達聰來直  
言於遠邇獻可替否圖庶政之中和重念臣爰自下僚  
以躋近列每膺除命皆出宸衷徒堅報國之心未獲隕  
身之所冀殫微力上答鴻私

舉自代狀



右臣伏覩朝散郎守尚書禮部郎中陳軒資性耿介志  
守廉靜學以為已不求人知使居言責必有所補臣實  
不如舉以自代



范太史集卷四